

Inuussutissarsiutigalugu piniartut nannuttamik amiinik qapiartitsisarnerannut suliaritineqarneranut akiusut malillugit akilerneqartarneranut akiliutaasup 50%-anik taperneqartarlernissaannik, ilanngullu angallanera Naalakkersuisut peqquneqarnissaannik Inatsisartut aalajangiiffigisassaattut siunnersuut. Nunat tamalaat nannut amiinik piniartut niueruteqarsinnaaneratt inerteqqutigaat, tamaalluni piniartut nannut amiinik tunisisinnaanerannut periarfissaarunnerannut taarsiutitut tapiissutip siunertaqarpoq.

(Inatsisartunut ilaasortaq Jens NapátôK', Partii Naleraq)

Akissuteqaat

(Inuussutissarsiormut, Nukissiuuteqarnermut, Iisimatusarnermut Suliffeqarnermullu Naalakkersuisoq)

Aappassaaneerneqarnera

Naalakkersuisut sinnerlugit Aalisarnermut, Piniarnermut Nunalerinermullu Ataatsimiititaliaq aalajangiiffigisassatut siunnersuutip suliarineqarneranut atatillugu sukumiisumik sulisimaneranut qutsavigerusuppara.

Naalakkersuisut nuannaarutigalugu maluginiarpaat nannut amiinik qitulisarnermut tapiissutinik atuutsitsilernissaq amerlanerussuteqartut tapersersoraat.

Pinngortitaleriffik Tunumi nannut amerlassusaannik missingersuinissamut misissuinermik suliaqartoq 2022-imi naammassineqartussatut naatsorsuutigineqartumik Aalisarnermut, Piniarnermut Nunalerinermullu Ataatsimiititaliap isumaliutissiisummini oqaatigaa. Naalakkersuisut Ataatsimiititaliamut paasissutissiissutigerusuppaat corona pissutigalugu misissuinissaq ukiumik ataatsimik kinguartinneqartoq, taamaattumillu misissuinerup 2023-imi naammassineqarnissaa naatsorsuutigineqartoq.

Naalakkersuisut nannut amiisa qitulisarnissaannut tapiissutitut aningaasartuutit naatsorsuutigineqartut aamma naatsorsorsimavaat. Nannut amiisa qitulisarnissaannut assartornerinullu tapiissutit 42.000 kr.-it 343.00 kr.-illu missaanik annertussuseqartussatut naatsorsuutigineqarput.

Siunnersuut aningaasaqarnikkut killissaliussat killeqartut iluanni piviusunngortinneqarsinnaassasoq naatsorsuutigineqarpoq, aammalu tamanna Inatsisartut kissaatigissagaluarpassuk siunnersuutip aningaasaqarnikkut sunniutissaasa 2021-mut Aningaasanut Inatsisissatut siunnersuummi ilanngunnissaannut Naalakkersuisut piareersimapput.

Taamatut oqaaseqarlutik Naalakkersuisut siunnersuutip akuerineqarnissaa inassutigaa.